

Pandangan Dunia Luar Terhadap Islam Dewasa Ini

Dalam karangannya ini, Tuan Muhammad Norman, menggambarkan dengan sejelasnya-jelasnya sikap orientalis-orientalis Barat yang jujur dan yang tidak jujur terhadap Islam. Tipu muslihat yang telah dijalankan oleh Prof Dr Snouck Hurgronje bagi menghalangi perkembangan Islam di Kepulauan Melayu telah dibentangkan satu persatu, akhirnya Islam telah berjaya menarik pandangan dunia Barat – Pengarang Qalam.

(Oleh: Muhammad Norman)

Kalau kita perbandingkan perhatian dunia luar terhadap Islam dan kaum Muslimin sebelum dan sesudah Perang Dunia Kedua, maka kita dapatilah bahawa perhatian itu jauh benar perbezaannya.

Sesudah Perang Dunia Pertama tahun 1918 hingga kepada Perang Dunia Kedua tahun 1940, sebahagian besar dunia Islam, berada dalam penjajahan negara-negara Barat, terkecuali beberapa negara Islam bekas jajahan Turki sahaja yang jadi negara naungan di bawah kuasa negara-negara Barat, seperti Perancis dan Inggeris.

Kalaupun negeri Iraq, sesudah itu mendapat kemerdekaannya, maka hal itu tercapai setelah dia memberikan pengorbanan yang mahal, demikian pula halnya Syria dan Lubnan. Tetapi Palestin malang nasibnya, kerana sebahagian negara itu telah menjadi negara Yahudi.

Berbalik kepada perhatian dunia luar tadi, kita dapatilah kalaupun ada perhatian dari-dari penjajah barat yang menguasai negeri-negeri Islam, maka perhatian itu bercorak dua:

Mencari Keuntungan

Yang dimaksudkan dengan mencari keuntungan ini, ialah kalau negara-negara penjajah yang menaungi negeri-negeri Islam

pada masa itu, maka maksud mereka dalam mempelajari soal-soal keislaman dan kaum Muslimin di negeri-negeri jajahan mereka itu semata-mata bagi keuntungan politik penjajahan belaka.

Kalau Prof Dr Snouck Hurgronje pernah belajar agama Islam di Mekah pada tahun 1880 dengan menyamar memakai nama Abdul Ghaffār Al-Holandiyy, maka akhirnya keluarlah fatwanya yang diamalkan oleh pemerintah penjajah Belanda, iaitu: gerakan suluk (suluk) di Aceh itu, yang dikehendaki mesti disekat dan dihapuskan sedapatnya-dapatnya, dan sebagai gantinya hendaklah diwujudkan sahaja gerakan paruk ibadah semata-mata dan jangan pula ada perhubungan antara satu daerah dengan daerah yang lain. Tujuan dari fatwa Dr Snouck Hurgronje ini ialah hendak menjauhkan dan memperkecil bahkan menghapuskan semangat perperangan dan perlawanan dari rakyat Aceh terhadap kekuasaan Belanda waktu itu. Suatu lagi, fatwanya yang nampak benar hasilnya pada hari ini ialah siasah pengkristianan dari pemerintah penjajah Belanda terhadap daerah Tanah Batak bagi menyekat hubungan antara dua daerah yang kuat semangat Islamnya iaitu daerah Minangkabau dan daerah Aceh di Sumatera utara.

Undang-Undang guru tahun 1925 ialah pancaran dari fatwa Prof Dr Snouck Hurgronje bagi menghalangi dan menghambat perkembangan agama Islam dan pengajarannya.

Memberikan Gambaran Yang Keliru

Maksud yang kedua dari perhatian tadi, ialah hendak memberikan gambaran yang kurang tepat dari agama Islam yang sebenarnya.

Dalam hal ini berjasalah Profesor-profesor, doktor-doktor, yang ahli tentang hal ehwal timur. Mereka ialah golongan orientalis seperti: Prof Dr Snouck Hurgronje, Louis Massignon, Margoliouth, Goldizher, Noldeke, Sir William Muir, Brockmann, Nicholson, Wensinek, dan lain-lain lagi.

Dari titisan pena kaum orientalis ini, terbitlah beberapa buah kitab yang tebal-tebal mengenai Islam menurut pandangan mereka.

Dari antara tulisan-tulisan mereka ada juga yang jujur, Seperti Thomas Carlyle di dalam kitab "Pahlawan-Pahlawannya". Banyak juga pendapatnya yang baik dan jujur mengenai Nabi Muhammad (SAW). Demikian pula Lozaref Satudara dengan kitabnya "*The New World of Islam*", walaupun

di sana sini ada cacatnya. Termasuk ke dalam golongan ini pengarang-pengarang kitab "*Wiser Islam*" yang terdiri dari:

(1) Prof C.C Berg dari Universiti Leiden, (2) Louis Massignon dari Universiti Paris, (3) G. Kimf Mayar dari Universiti Berlin, (4) Letenan Kolonel Farari, dan (5) Prof H A.R. Gibb, London

Tetapi di antara yang tidak jujur dan memberikan gambaran yang salah terhadap Islam ialah antara lain: Lord Cromer, bekas Gabenor General Inggeris di Mesir dan Lord Gild Stern, anggota parlimen Inggeris

Pada tahun 1937, Prof G.H. Buskit seorang mahaguru dari Universiti Perancis di Al-Jazā'ir telah melawat Indonesia. Beliau ini orang Perancis ibunya Belanda. Setelah ia kembali Al-Jazā'ir, ia telah mengarang sebuah kitab yang diterangkan di dalamnya bahawa menurut pendapatnya: Pemerintah Belanda di Indonesia terlalu berlapang dada sehingga memberikan kesempatan kepada umat Islam Indonesia naik haji dan keluar menuntut ilmu di Mesir dan di negeri-negeri Islam yang lain.

Kalau kita perhatikan pandangan dan tindakan negara Perancis terhadap negeri-negeri Islam yang jadi jajahannya, seperti Morocco, Tunisia dan Al-Jazā'ir dengan menghentam sahaja gerakan kaum senusyn dan kaum rifiyyin, dan demikian juga tindakannya terhadap tanah jajahannya di Indo-China maka kita bertambah yakin akan benar "fatwa-fatwa" orang-orang seperti Prof Buskit tadi terhadap negara-negara barat yang mempunyai tanah-tanah jajahan yang berpenduduk Muslimin.

Hal-hal seperti yang tersebut di atas tadi ialah kejadian sebelum dan sesudah Perang Dunia yang Pertama (1914-1918).

Sesudah Perang Dunia Kedua

Adapun sesudah Perang Dunia Kedua (1939-1945) maka perhatian dunia luar Islam terhadap Islam dan Muslimin sungguh jauh benar berubahnya. Hal-hal yang menjadi sebabnya antara lain ialah:

Bahawa negara-negara Islam bekas jajahan negara-negara penjajah barat itu, sekarang telah menjadi negara-negara merdeka dan ada pula yang sedang memperjuangkan kemerdekaannya.

Setengahnya pula telah sihat dan kuat seperti Turki, Mesir, dan lain-lainnya. Sebab-sebab yang lain ialah kesan balas yang ditunjukkan oleh negeri-negeri Islam, baik yang berupa

huraian-huraian, buku-buku dan majalah-majalah yang ditulis dalam bahasa Barat bagi menerangkan kebenaran ajaran-ajaran Islam hakiki. Di samping itu pemimpin-pemimpin Islam telah berdaya upaya memberikan ceramah yang bersifat pengetahuan Islamiyah dalam gelanggang-gelanggang pengetahuan dan lembaga-lembaga ilmiah bangsa Barat sendiri.

Di antara negeri-negeri barat yang banyak menumpahkan perhatian terhadap Islam ialah Amerika Syarikat.

Rakyat Amerika ini pada masa-masa yang lampau belum pernah dihingga oleh penyakit kesombongan dan keagungan penjajahan kerana mereka tidak mempunyai tanah jajahan. Apalagi di negeri-negeri Islam. Di samping itu sikap Amerika yang berdasarkan kenyataan dengan membuat penyelidikan yang saksama dan mendalam.

Pada hari yang akhir ini ada benar kecenderungan dari masyarakat keilmuan di Amerika ini hendak mempelajari keislaman dari orang-orang Islam sendiri.

Oleh itu, kerap kali mereka meminta ahli-ahli, doktor-doktor, dan profesor-profesor dari negeri-negeri Islam untuk memberikan syarahan di universiti-universiti mereka. Demikian besarnya perhatian yang tersebut hingga dari pegawai-pegawai kedutaan negara-negara Islam yang mempunyai perwakilan di sana, kerap kali diminta memberikan syarahan Islam di universiti-universiti atau di lembaga-lembaga pengetahuan.

Di antara universiti-universiti itu ialah "Cornel Universiti". Dalam tahun 1953 almarhum Tuan Haji Agus Salam kerap kali memberi syarahan di universiti itu.

Pada bulan September 1953 suatu muktamar yang memperbincangkan soal-soal kebudayaan Islam telah diadakan oleh Princeton University. Muktamar ini telah

berlangsung selama sepuluh hari (dari 8 sampai 18 September) yang dihadiri oleh ahli-ahli pengetahuan Islam dari seluruh dunia. Mesir, Turki, Pakistan, India, Iraq, Jordan, Yaman, Indonesia dan Malaya masing-masing telah mengirimkan wakilnya. Malaya diwakili oleh Pendeta Za'ba dan Indonesia diwakili oleh almarhum Haji Agus Salam dan Muhamad Ghafrawi.

Kesempatan Baik

Jelasnya, suatu hal telah nyata, bahawa perhatian orang luar Islam telah banyak timbul, dan bagi ahli-ahli dan bijak pandai Islam ada kesempatan baik untuk menjalankan tabligh dan mendakwahkan isi al-Quran. Dengan jalan itu, amanat Nabi kita (SAW) kepada ulama Islam yang disifatkan menjadi waris Nabi-nabi, dapat dijalankan kepada umat yang selama ini ditutup-tutup oleh ahli-ahli pengetahuannya dan pemerintahannya daripada melihat nur Ilahi yang wajib disampaikan kepada mereka.

Dapatkanlah buku-buku untuk menambah pengetahuan

tuan/puan:

- | | |
|------------------------------|--------|
| 1. Risalah Allah | 40 sen |
| 2. Permulaan Agama | 70 " |
| 3. Perempuan Islam | 30 " |
| 4. Iman Perempuan | 20 " |
| 5. Perempuan dan pilihanraya | 40 " |
| 6. Taklid | 60 " |
| 7. Qada dan Qadar | 25 " |
| 8. Berjihad Pada Jalan Allah | 70 " |

Alamatkanlah kepada:

QALAM

356/8, Geylang Road,

Singapore 14.